

遼東三家集

三

隅夢草堂

詩稿

孟錫珏題

隅夢草堂詩草

自敘

余家居遼海間甲午之亂兵寇交訐室家蕩然乙未夏
和議告成八月聞松翁延夫子有查辦墨河金場之命
九月廿一日趨至瀋垣迎謁至則師於是日已北行矣
追呈一函以述亂離之苦臘月廿四日歸家拜見慈顏
老母喜謂曰能飲能食能睡似此不能死也琛拜畢起
坐母旁撫摩手臂及兩頰笑曰母不瘦也母亦引手摩
琛手臂頸頰曰汝亦不瘦琛應曰然母忽曰吾今者頗
欲死琛驚問何故曰吾壽已高矣福亦足矣天下將大

亂不欲以一付老骨累汝等也 琛曰已太平矣不必過
慮但望母年過百歲兒孫等皆得享老母福蔭先是避
難山中時一日摩老母頂心開一穴僅如指甲大驚問
曰母天門何時開母曰已三年矣吾語汝吾他日死無
大疾魂由此出也汝識之因又摩頂心穴則大如錢心
大驚不敢言退語兄伯韓公曰母天門大開矣可奈何
兄亦驚曰可奈何正月六日母忽疾旋愈精神如故而
飲食頓減舉家大戚日視頂心則日熱一日廿三日猶
起坐如平時而頂心一穴汗出不止其熱非常問之不
言但曰今日不死比夜半起坐洎然而逝年八十有三

正月廿四日子時也而起坐之時適在亥正嗚呼琛侍疾無術侍親無狀不能挽老母終天之駕罪何可贖自恨而已四月合葬先父之墓將廬於墓側視朝夕香火奈家貧不能為室兄又病甚兼之飢寒迫人不謀一策自衛勢必立困以亡不得已於五月廿九日赴省時友人魏柏巖丁艱歸籍依帥延入幕中往尋之覓一差也居三月無所就而兄伯韓公又於六月疾卒始決計北行十一月赴吉林時松翁夫子署將軍事臘月入夫子幕中丁酉二月派釐捐局幫辦差使檇櫟之材本不中繩墨夫子憐之恤其窮耳局務甚簡可取暇讀書而自

二月入局五月見病九月病重幾死者屢矣丙戌正月
始有起色亦未脫體忽病忽愈直與病為形影矣追思
北上之初中路所見有感於懷因以詩紀之續有所詠
錄而存之存一時鴻跡云耳詩云乎哉

房仲南先生年譜

道光二十五年乙巳一歲

六月十五日未時先生生於遼陽城南武將臺故居

道光二十六年丙午二歲

道光二十七年丁未三歲

道光二十八年戊申四歲

道光二十九年己酉五歲

胞弟叔越生

道光三十年庚戌六歲

咸豐元年辛亥七歲

堂叔子和公生四女而無子頗懷伯道憂父鏡潭先生慰之云余現生有三子他日弟婦果不育男此三子中當以一人繼吾弟然長子無出繼理遂手撫先生之頂曰此子骨重余愛之不能給汝又手指叔越先生云彼可也後果以叔越先生嗣子和

咸豐二年壬子八歲

出就外傳

咸豐三年癸丑九歲

咸豐四年甲寅十歲

胞弟季清生

咸豐五年乙卯十一歲

咸豐六年丙辰十二歲

咸豐七年丁巳十三歲

與伯兄伯韓隨父鏡潭先生讀書於佟氏園九月九日登鞍山夕陽寺與伯韓賦詩鏡潭先生次韻有光陰過眼離弦箭事業傷心落鼎丹句

咸豐八年戊午十四歲

咸豐九年己未十五歲

咸豐十年庚申十六歲

咸豐十一年辛酉十七歲

房仲南先生年譜
同治元年壬戌十八歲

同治二年癸亥十九歲

同治三年甲子二十歲

代父撰祭姻伯陳忠節公文體擬昌黎士林傳誦

同治四年乙丑二十一歲

同治五年丙寅二十二歲

同治六年丁卯二十三歲

劉仙樵陳鶴溪兩先生評所作七言古體詩爲月下
謫仙人復生字得板橋道人之逸

同治七年戊辰二十四歲

六月以府試第一捷泮宮與廣甯劉東葛先生懷德榮可民先生同受知於學使任蕢臺是歲與榮可民爲石友八月聞長兄伯韓在岫巖旅邸患病九月一日與道士孫丹亮徒步赴岫巖尋兄十月初同歸時太夫人李患目疾旋失明

同治八年己巳二十五歲

應科試是歲始設館於佟氏園世弟賈錫三從遊時賈年二十二以府試第一入泮後以次女妻其子國颺字伯峯

同治九年庚午二十六歲

赴都應順天鄉試由營口泛海至大沽時天津有焚
教堂事同行中程克昌毛穎出京無旅費託向陳鶴
溪借銀鶴溪以諸人無行止不許不得已自借三十
餘金轉借諸人行至甯遠諸人資又罄又借地租錢
一百七十千適兄伯韓因催租涉訟事雖直而病痢
牽馬扶兄日行淺水中泥塗之苦不可言狀

同治十年辛未二十七歲

再館佟氏園七月應歲考以一等第一補廩學使爲
張霽汀雲卿是歲治舉業之餘從父鏡潭先生受內
經脉經傷寒金匱之學

同治十一年壬申二十八歲

春試選拔携生徒入省與劉東葛先生定交是歲可
民東葛兩先生得選拔張學使期以次歲優貢與之
時有三才子之目

同治十二年癸酉二十九歲

夏赴省考優貢至院科投考則海城學官未送卷細
訪方知海城學中王某舞弊欲赴海城備卷苦於無
費遂西謁劉東葛先生之封翁於八角臺求將伯之
助一見大喜曰與汝弟僱車一輛錢二百千金百兩
爲鄉試計至京再寄二三百金必不令汝兄弟空手

也並選吉日起行至日乘車要東葛於鹿玉洲先生
書齋先生索詩爲賦七言題扇而去至京甫一月東
葛以奔喪歸幸榮可民魏節珊魏柏巖三人至試罷
歸抵廣甯與可民諸人弔東葛喪助葬而歸是歲三
女畹蘇生

同治十三年甲戌三十歲

館塞上可民將謀山居亦有其志

光緒元年乙亥三十一歲

三月初旬與堂叔子和公同車赴騰鰲堡日已過午
行至甯遠屯村西突見火光十餘条長逾數十丈起

於西南天末向東飛去其聲隆隆先生歎曰此爲天魔出世洪楊之變其再見於東三省乎蓋爾時去洪楊之亂未遠故道及也是月赴省出保魏憲臣請代館於十趙台

光緒二年丙子三十二歲

丁父憂治天文地理之學旁及星命壬遁之術

光緒三年丁丑三十三歲

著檀弓辛語

光緒四年戊寅三十四歲

自治舉業受王洛橋先生批判洛橋先生爲東三省

四大先生之一奉省南部舉貢多出其門

光緒五年己卯三十五歲

八月二十七日子象權生冬十二月先生同兄伯韓赴省胞弟叔越御車行至十里河村北突來鬍匪一名跨馬持槍逼兄若弟於數武外下馬登車搜括財物先生突起曳其兩足匪被曳墮於車叔越先生按其背伯韓先生奪其槍轟然發聲鉛丸直洞匪首登時斃命於是車載匪人牽馬至十里河駐防之行營報案營總查匪所攜贓證有關他案即予完結

光緒六年庚辰三十六歲

中秋月夜自集市歸是歲夢夢錄成

光緒七年辛巳三十七歲

懸壺省城與僧人蓮浦爲方外交蓮浦善書畫書法
逼真草聖畫學唐伯虎而葡萄鼠乃其絕技人不易
得病痰飲至危急先生視之曰爾病至此尚復何戀
莫如以藥毒爾速死蓮浦以首叩枕曰苟如是復何
求先生書仲景之甘遂甘草湯付其徒速爲檢藥藥
肆謂兩藥相反入咽即死必索保而後與三義廟住
持出與作保其藥方得入煎次日先生晨眠未起忽
聞窗外大呼曰仲南我愈矣推扉而入則蓮浦也